

3,000 ahli bekas tentera, polis ikrar taat setia

UM 26 JUN 2001

BANGI 25 Jun — Lebih 3,000 ahli persatuan bekas tentera dan polis hari ini melafazkan ikrar taat setia terhadap Datuk Seri Dr. Mahathir Mohamad dalam satu majlis di Dewan Serbaguna, Universiti Tenaga Nasional (Uniten) di sini.

Mereka yang mewakili lebih 300,000 ahli kedua-dua persatuan bekas pasukan keselamatan itu turut menyatakan sokongan tidak berbelah bagi terhadap kepimpinan Perdana Menteri yang telah membangun dan memajukan negara.

Ikrar taat setia itu disampaikan oleh Presiden Persatuan Bekas-Bekas Polis Malaysia (PBBPM), Datuk Mansor Md. Jaafar dan Presiden Persatuan Bekas tentera Malaysia (PBTM), Senator Datuk Muhammad Ghani dalam majlis jamuan mesra yang julung-julung kali diadakan antara Perdana Menteri dengan ahli kedua-dua persatuan.

Mansor dalam ucapannya berkata, bekas anggota pasukan keselamatan terutamanya polis bersepakat untuk memberikan sepenuh kesetiaan kepada kerajaan walaupun tidak lagi berkhidmat dalam pasukan itu.

Menurut beliau, PBBPM berharap dengan kepakaran dan pengalaman yang ada pada Perdana Menteri, keamanan dan kemajuan negara akan dapat dicapai.

Sementara itu, Muhammad berkata, bekas tentera berjanji akan terus memperjuangkan wawasan Perdana Menteri untuk memajukan negara menjelang tahun 2020 ini.